

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"E ao to tei hamani-ino-hia i te parau-tia ra; no ratou hoi te basileia o te ao." Mat. 5: 10.

Nu. 3.

10 Ditema, 1910.

Mat. 4.

Tuatapaparaa Parau no te Mau Faaroo, e te Muru o Teie Nei Mau Fenua i Mutaa Ihora.

I TE mau tau tahito i mairi a'e nei, ua vai teie nei mau fenua i raro a'e i te faatereraa Etene, oia hoi te haamoriraa i te mau Atua ofai, e vetahi atura mau Atua i haamorihia i tahito ê ra. E vetahi atu â mau peu au ore. E tae roa mai i te matahiti 1797, i tae mai ai vetahi mau orometua no te haapaoraa Porosetani no Beritani i Tahiti nei, e ua haapii i te parau no to ratou faaroo, e ua farii hoi to Tahiti ia ratou, e ua faatia i to ratou mau fare pureraa e ua baptizo i te taata, e ua faatoroa i te taata i te toroa orometua e te diakono. Purara'tura no te mau fenua rii moana nei, e tae noa'tu i te mau fenua Tuamotu. E ua fariihia te reira haapaoraa e te mau fenua e rave rahi. E muri a'e i te reira tupu maira te haapaoraa Katorika i Tahiti, haapii maira i te taata, farii atura te mau taata e rave rahi, faatia ihora i te fare puraraa. Baptizo ihora i te taata oia hoi baptizoraa ninii. Purara haere atura na teie nei mau fenua. I te hoê no Tiunu i te oire ra o Navoo i Amerika, i te m. 1843 ua faaue te peropheta ra o Iosepha Semita i na orome-

tua no te ekalesia a Iesu Mesia i te Feia Mo'a i te Mau Mahana Hopea Nei, e haapii haere i te evanelia i te mau fenua rii moana nei. Teie te io'a o taua mau orometua ra oia hoi o Adison Pratt, e o Noah Rogers, e o Knowlton F. Hanks, e o Benjamin F. Grouard. E i te hoê no me i te m. 1844 ua tapae ratou i te fenua ra o Tupuai. Haapii atura te taata i te tumu o te faaroo mau, rave atura i te tapao, e te piri e rave rahi mai ta Iesu i parau i te mau aposetolo. Mareko 16: 17-18. Fariihia maira ratou e te taata. E e rave rahi ta ratou taata i bapetizo, e tei faatoroahia. E ua faatoroahia te Peresibutero, te Tahu'a, te Haapii e te Dia-kono e ratou. Faatia ihora te ekalesia i reira. Haapii maira ratou e, o Iosepha te taata apî i maiti-mau-hia, e i parau hia maira e te melahi, ei faaite mai i te parau oaoa, oia hoi ua faaho'ihia maira te evanelia e tia i te vairaa ei paroraa'tu i te feia e parahi i te ao nei ra, i te mau fenua atoa, e te mau opu atoa, e te mau reo atoa, e te mau nunaa atoa. Zek. 2: 2-4; Apok. 14:6. No te aha ra ua faaite mai te melahi i taua mau parau ra? Teie ia, no te mea aita te evanelia i nia iho i te fenua nei. Ua tae mau ra te tau i tohuhia e te peropheta, i te na ôraa e. "Te fatata maira te tau e hopoi atu ai au i te o'e i nia i te fenua, e ere râ i te o'e maa ore, e te hiaai i te pape, i te faaroo râ i te parau a Iehova; e horo hoi te taata i te tahi miti e te tahi miti; e mai te apatoerau e tae roa'tu i te hitia o te râ i te hororaa e te ho'iraa mai, i te imiraa i te parau a Iehova, e ore roa râ e itea." Amosa 8: 11-12. I na mahana i muri a'e ua reva tia'tura te tahi pae o ratou i te mau fenua Tuamotu, tapae a'era i Anaa. Tamata'tura i te haapii i te taata i te parau a te Atua. O Turuati te tahi orometua ua tae i reira. I parauhia ua rave oia i te piri, te tapao, e te mau semeio ua rau i te huru, e mana rahi ta'na i rave i reira. Ua ora te ma'i, ua araara te matapo. Tei ia'na mau te mana ta te Mesia i horoa mai i te mau aposetolo, oia hoi, "E poro haere outou e faaora i te mau ma'i, e tiavaru i te mau demoni, etc.

Mat. 10: 8. I muri a'e ra ua farii te tahi pae o to Anaa ia'na. Bapetizo atura i te taata i te bapetizoraa i raro i te pape ia matara te hara, e i muri a'e tuu atura ite rima i nia iho ia ratou no te horoaraa i te Varua Maitai. Ohipa 8: 17. Faatoroa ihora i te tahi pae ei peresibutero, e ei tahu'a, e ei haapii, e ei diakono, horoa'tura i te mana no ratou. Pura-ra'tura na te mau fenua. E i muri iho i te reira, ua tupu i te hamani ino rahi i te mau orometua e te ekalesia atoa. No te parau mau e te i'oa o Iesu Mesia ta ratou i haapii haere ua ririhia ratou e te mau enem i rave rahi. Mataio 24: 9-10. Ho'i ana'e atura te mau hitu ahuru i te fenua papaa. I muri a'e i te reira mau mahana ahoaho rahi no te ekalesia. Ua tia maira o "Tihoni" faatere atura i te ekalesia i Anaa. I parauhia i na matahiti rii i muri iho tupu maira te mau ati hamani-ino-puto-hia'tura o Tihoni ma i mua i te haavaraa. Mat. 10:18. Faarue atura te tahi pae i te faaroo. Pee atura i hoê haapaoraa ê, nounou atura i to ratou iho ora, e mou atura to ratou roo maitai. Moe ihora ratou i ta Iesu parau o tei na ôraa e "O tei tapea i to'na ora e ere ia oia i te ora; area te tuu noa i to'na ora no'u nei, e ora ia to'na."— Mat. 10: 39.

Tia'tura o Tihoni i mua i te haavaraa, aita i mātā'u i te mata 'o'e, e te mau haavî i faairihia mai i nia ia'na. Aore roa i nounou i to'na ora, no te evanelia a te Mesia. E inaha hoi ua faatia-mau-hia oia e ta'na ekalesia'toa e tae noa'tu i to'na poheraa tura rahi. Ua tia maira Pake faatere maira i te ekalesia e tae noa'tu i to'na poheraa, mai te roo maitai e te tura. Ua monohia oia e Taoto, e ua faatere maira oia i te ekalesia mai te maitai e tae noa'tu i to'na poheraa tura rahi. Ua mono Teahotuatua ia'na. Muri a'era bapetizohia'tura Teahotuatua i roto i te ekalesia Tanito. I te reira mau mahana ua tia maira o Maihea, faatere maira i te ekalesia.

Ua vai noa te ekalesia i raro a'e i te faatereraa a te mau orometua maohi e tae noa maira i te avae Tenuare i te m.

1892, i tae mai ai na orometua ra o Jos. W. Damron e o William A. Seegmiller. Reva tia maira Iosepha W. Damarona i te mau fenua Tuamotu nei. Reva tia'tura Viliamu Setemila i Tupuai. Ua faarihia raua toopiti atoa i na fenua i haerehia'tu e raua. I te 24 no Mei te matahiti 1850, ua tae mai te orometua ra o Iakobo. E i te 26 no Novema i te matahiti 1852, ua tiavaruhia'tura oia e ua reva i te oire Roto Miti i te fenua Utaha. E i te hoê no Tiunu, 1892, ua tae faahou mai oia i Tahiti nei. I te 8 no Tiurai, 1893, reva'tura oia i te fenua ra o Amerika. Ua mau maite oia i te faaroo e tae noa'tu i to'na poheraa tura rahi. E te vaihohia ra te korono hanahana rahi no'na ia tae i taua mahana ra. Ua tae mai Iakobo e ta'na tamaiti o Elano e o Tamati i Takaroa nei. Ua rahi roa te oaoa e te popou o te mau taeae no te mea e 40 matahiti to'na moeraa. Te piti teie i to Iakobo taeraa mai i te mau fenua moana nei. Aore roa i huru ê aore i parari aore e i'oa apî maori râ, o te i'oa ra o Te Ekalesia a Iesu Mesia i te Feia Mo'a i te Mau Mahana Hopea Nei. E ua tae faahou mai Viliamu Setemila i te avae Mati i te matahiti 1909. Te piti teie o to'na taeraa mai i te mau fenua moana nei. Oia mau roa ta Daniela i tohu ra e ore e mou, e ore e parari teie nei ekalesia, e vai â e amuri noa'tu.

Ua faauehia na orometua toomaha e te peropheta ra o Iosepha ia poro haere ratou i te evanelia i te mau fenua rii moana nei. E teie to ratou ra mau i'oa, oia hoi, Addison Pratt (Paraita), e Noah Rogers (Ratati), e Benjamin F. Grouard (Turuati), e o Knowlton F. Hanks (Hanati). Ua faarue ratou i te oire ra o New Bedford, Mass., i Amerika i te 9 no Atopa, 1843. Na nia ia ratou i te tahi pahi ta ie "Timoleon" i te tere. I te mahana 3 no Novema ua pohe roa Hanati e ua tãnuhia oia i roto i te moana. E ua tere ratou na tua e hitu avae tapae atura i te fenua ra o Tupuai i te mahana 1 no Me, 1844. I te 16 no Tiunu ua bapetizo Paraita i te hoê taata papaa o Ambrose Alexander i reira.

— DAHA PUHARA.

Te Parau Tuatapapa no
Iosepha Semita.

(TUATIRAA.)

PENE III.

MATAHITI 1820-1823.

Ua parare atura i te parau apî ua ite na ia Iosepha i te tahi orama. Te hinaaro atu nei â oia i te maramarama. Ua fâ mai te tahi melahi ia'na.

E RAVE rahi i te mau tenetere i mahemo a'e nei, aore te hoê taata i te ao nei i parau mai e, ua hi'o, e ua farerei, e ua parau atu, e ua hapiihia e te hoê no te ra'i. Area râ ua haapii-mau-hia ua opani-roa-hia te mau horoaraa, te mau orama, e te mau melahi no te ra'i, e e ore roa e tae faahou mai i te taata nei. E inaha ua parau maira ia Iosepha ua fâ mai ia'na ra te Atua metua e i ta'na ihora tamaiti ia Iesu Mesia o tei hamani i te ao, e te taata, e te mau mea atoa to nia iho. Maere noa ihora te mau taata i te reira huru haapiiraa apî. Ua parau mai te mau taata e rave rahi, na ô maira, ei parau haavare ana'e te reira. Area râ ei tamaiti haerea tia e te haavare ore mai to'na apîraa mai â. Ua tupu ihora te mätä'u no te tahi mau taata o tei faaroo i taua parau ra, peneiae ei parau mau ta'na, no te mea aore ratou i hinaaro i te parau mau, e ua tamata ihora ratou i te faaore i taua parau ra i te tâhitohito e te hamani ino. E i e toofanu pue mahana i muri a'e i te orama i iteahia e Iosepha, ua farerei atu ai oia i te tahi orometua no te tufaa ekalesia Porosetani i parauhia Medoti. Ei reira to Iosepha faaiteraa'tu ia'na i te orama i iteahia e ana. Ua na ô maira taua orometua ra, no te Diabolo taua orama ra. E ua parau mai oia aore te orama i iteahia no ô mai i te Atua ra e te taata mai te anotaui mai o te mau Aposetolo e inaha

noa nei â e e ore e ite-faahou-hia e amuri noa'tu. Teie râ, ua papu roa ia Iosepha ua ite ê na oia i te orama hanahana rahi, aita roa'tu e tia ia'na ia huna i te reira, ahiri oia e huna'i ua riro te reira hunaraa ei hara rahi roa ia'na i mua i te aro a te Atua. E tamaiti apî oia, area râ ua tâhitohitohia, e ua hamani-ino hia e te mau huru taata e rave rahi. Ua riri roa te mau orometua no te mau haapaoraa e rave rahi ia'na, e i ta'na atoa ra utuafare, no te mau parau i parauhia e ana. E e rave rahi to Iosepha mau hoa i mutaiho; area râ i muri mai, ua faarue ratou ia'na, e ua riro atura ei enemi no'na. E no reira ua imi atura oia i te tahi mau hoa apî. Ua mairi i muri na matahiti e toru e te afa, mai te tau mai â i iteahia te orama matamua e Iosepha. E ua fatata oia i te 18 o to'na matahiti. Ei reira ua tupu ihora te hinaaro ia ite to'na tiaraa i mua i te Atua. I te po 21 no Setepa i te m. 1823, hou to'na taotoraa, ua pure oia i te Atua ia faaore mai i ta'na mau hapa rii tia ore ra i ravehia e ana. Aore hoi i oti ta'na pure, ua hamata ihora te poiri i roto i ta'na piha i te pee, e ua monohia mai ia i te tahi maramarama anaana rahi, e i ropu a'era ite atura Iosepha i te hoê melahi. Mai teie te huru o taua melahi ra i ta Iosepha faaiteraa. Ua au ia'na i te tahi taata roa, e te tino huru rahi, e te mata purotu maitai ra. E ahu roa, e te tea-tea hoi to'na. E anaana'tura to'na mata, mai te uira ra. Tei roto oia i te fare i pihaiho i te roi no Iosepha, aore hoi ta'na avae i tiaia noa'tu i te hoê mea, ua faaê'a i oia i roto i te mata'i i nia'e i te tahua fare. Ua parau maira te melahi ia'na, na ô maira, "O vau o Moroni, i tonobia mai au no ô mai i te Atua ra." E ua faaite mai oia ia Iosepha ua faaroo-hia ta'na pure, e ua faaorehia ta'na mau hapa rii i rave na, e te vai ra te tahi ohipa rahi ia'na. E i te raveraa i taua ohipa ra e riro to'na i'oa i te parauhia no te maitai, e no te ino hoi i te mau opu atoa, e te mau re'o atoa, e te mau nuna atoa no te ao nei. E ua faaite atoa'tu oia ia Iosepha i te tahi mau api auro e vai nei i huna-ê-hia na i ta'na iho

rima i roto i te tahi aivi i fatata mai, O te papaa parau ia tei ootihia i nia i taua mau api ra no te feia tahito o tei parahi i nia i te fenua ra o Amerika. E ua papai-atoa-hia ia i roto i taua papaa parau te i o te evanelia a te Mesia ra. E ua faaite atoa mai oia i te huru o te Urima e te Tumima, o te tahi mea huru ê ia mai te titea mata nei i te huru tei haamauhia i nia i te tahi paruru ouma auro. Te tahi mea teie i tuuhia mai e te Atua ei ravea ia tauturu atu i te iritiraa i te parauêê i ootihia i nia i te mau api auro ei re'o Beritani. Ei reira ua taio te melahi i te tahi mau parau tohu no roto mai i te Bibilia o tei ore i tupu, area e tupu râ i te tau hopea nei e tia'i, ia faaho'ihia mai te autahu'araa, e ia ninihia mai te varua i nia iho i te taata atoa, e ia parahi te mau mea atoa i roto i teie nei ao mai te hau e te peapea ore.

Te tahi mau parau ua taio noa mai oia i te reira mai tei te Bibilia nei. Area te tahi pae ua faahuru ê, e ua faarirohia te reira e mea papu e ana. Ua haapii mai oia ia Iosepha i te tahi mau parau eita e tia ia faaite mai no te mea e, e mea mo'a roa. Ua faaue oia ia Iosepha eiaha roa oia e faaite atu i te mau api auro, e te Urima e te Tumima, e te paruru ouma ia noaa ratou ia'na i te hoê taata, maori râ ia faauehia mai oia e te Fatu ra. A parau mai ai te melahi inaha hoi ua oramahia ia Iosepha, e ua ite papu atura oia i te aivi ra o Kumora, e te vahi, i vai ai te mau api auro. Ei reira te peeraa'tu i te maramarama e ua maue ê atu te melahi. E i muri a'e i to'na revaraa i faahou te piha i te poiri, parahi noa ihora Iosepha ma te umere e te oaoa rahi. E muri iti a'e ua i-faahou-hia te piha i te maramarama, e ua tapitihia maira te orama ia Iosepha. E ua faaite mai Moroni ia'na i te mau ati ri'ari'a e fatata i te tupu i nia i te fenua nei. Oia hoi te mau ati ma'i pohe, te ati poia, te ati 'o'e, e te aueueraa fenua, e te tahi atu â mau ati ri'ari'a rahi. E i oti a'era ta'na haapiiraa, maue ê atura. Aita i maoro ua tae faahou mai te melahi e o te toru teie o to'na taeraa mai

i taua po ihora. E ua haapii mai oia ia Iosepha i te mau haapiiraa e au ai. E i ta'na parau hopea ua faaaraara maite mai oia ia Iosepha eiaha oia e hinaaro ia noaa te mau api auro ei faufaa na'na iho, maori râ ei faahanahanaraa'tu i te Atua, e ei faatiaraa i to'na basileia i nia iho i te fenua nei. Aore Iosepha i varea noa'e i te taoto i taua po ra. Ua ore te orama, e ua ao. Tia a'era oia i nia haamata ihora i te ohipa i taua mahana ra.—VILIAMU SETEMILA.

(E tuatihia mai teie parau.)

Te Fenua ra o Mawaii.

I PARAUHIA e fenua nehenehe e te faufaa rahi hoi. E vau motu tei taua fenua ra. E mea rahi roa te mau faaapu to, te painapo e te raiti i reira. Teie te moni e au no te mau maa i hoohia'tu e ratou i te hau Amerika i te matahiti hoê, oia hoi 42,000,000 tara. E hau Amerika to reira. E te haapii nei te mau tamarii i reira i te re'o Beritani i roto i te mau haapiiraa no te hau. Honolulu te oire rahi no taua fenua ra, e e 35,000 taata tei roto ia'na i te parahiraa. Te vai nei te mau ravea maitatai, mai te pereoo auahi, te pereoo uira, te parau niuniu, te parau reva, te mau mori uira, e te mau fare tipaeraa rahi nehenehe roa ra atoa i reira. E 26 maile ei purumu pereoo auahi tei otiite haamanihia i taua oire ra. Ia hinaaro te taata i te haere i te vahi atea e aufau ratou i te moni e 5 pene i te taata hoê, e e ou'a noa'i i nia i te pereoo, e na te reira e afai noa ia ratou i te vahi i hinaarohia. E mea nehenehe roa te reira e te ohie hoi. E toru vea, oia hoi te Advertiser, te Star e te Bulletin tei neneihia i roto i te re'o Beritani i reira, no reira e ite ai ratou i te mau parau apî no te ao atoa nei i te mau mahana atoa e hope roa'e i te matahiti. E tae mai te parau apî no te fenua papaa mai ia ratou, na roto i te taura niuniu i raro a'e i te moana. E te vai atura te tahi mau vea i

neneihia i reira i roto i te mau reo ẽẽ. E fenua taata roa taua fenua ra, oia hoi 150,000. E teie to ratou huru ia faataa 25,000 papaa uouo, e 30,000 Tinito, e 30,000 Tapone, e 25,000 Potogi, e 40,000 taata maohi a'ia no taua fenua ra. E mea ruperupe rahi "Te Ekalesia a Iesu Mesia i te Feia Mo'a i te Mau Mahana Hopea Nei" i te fenua ra o Hawaii, e te tupu noa nei â i te rahiraa. Teie te rahi o te feia mo'a, 8,000, e e 45 fare pureraa, e e 60 amaa ekalesia. Tei te oire ra o Honolulu ana'e 2,000 feia mo'a i te parahiraa. Te haapii haere nei na orometua 30 i te evanelia i taua mau fenua ra. E ua tomo mai na taata apî i roto i te ekalesia 200 e tiahapa mai te avae Tenuare e tae roa mai i te avae Atopa i mairi a'e nei. I te matahiti 1864 ua hoo te ekalesia i te tahi fenua ei faaapuraa no ratou i Hawaii oia hoi 6000 tâ fenua. E te rave nei 125 taata i te ohipa i nia iho i taua fenua faaapuraa ra i teie nei. Ua rau i te huru o te mau mea i faaapuhia e ratou i reira, area râ te faaapu rahi ra, o te to ïa; e te mana'o nei ratou e, e noaa 1,200 tane tihota no taua faaapuraa i teie nei matahiti. Te manuïa roa nei te ohipa a te mau taeae, e te mau tuahine, i te paeau tino, e te varua atoa hoi i taua fenua ra, e te parahi nei ratou mai te oaoa e te mauruuru rahi. —W. A. S.

I te mahana 12 no Ditema, M. 1850, ua tae atu te mau orometua no te ekalesia a Iesu Mesia i te Feia Mo'a i te Mau Mahana Hopea Nei i te fenua ra o Hawaii. E i na avae rii, i muri iho haamata ihora ratou i te bapetizo i te taata. E mai reira mai â e inaha noa nei ua vai maitai te ekalesia i reira. I parauhia i te anotou i iteahia taua fenua ra e Captain Cook i te Matahiti 1778 e fenua taata maohi roa, oia hoi 200,000, area mai reira mai â ua haere ratou i te itiraa, e teie te rahi o te taata maohi i reira i teie nei, oia hoi 40,000. Ua riro taua fenua ra ei fenua no te hau Amerika i te 7 no Tiurai, 1898.

Oroa Rahi i Tahiti Nei.

I HAAPAOHIA na te Atimarara o de La Croix de Castries. I te 23 no Novema ua tae mai te pahi rahi atimarara "Montcalm." Teie te rahi o te taata i nia iho ia'na, oia hoi 650 mataro e 30 raatira. E oroa iti rahi i na mahana e maha. Na te hoê harururaa pupuhi i nia i te manuâ i te hora 3 i te 24 no Novema i faaite mai i te hui raatira i te haamataraa o te oroa. E i muri iti a'e e tia'i te mau fare faaarearearaa ia haamata i te mau huru rii peu. Hora 4 i nia i te uahu.

Hi'oraa Vaa tauati. Ia hoehia taua mau vaa ra e na taata 20. Ei ahu faahi'ahi'a Tahiti mau ta ratou. E ua tuuhia'tu te rê i te mau vaa te hau a'e te unauna e te rahi roa'e te peu maere i te raveraahia. Rê 1, 100 Fr; Rê 2, 75 Fr; Rê 3, 50 Fr. E ua faatere-atoa-hia ia te mau vaa rii. E mea nehenehe atoa, Rê 1, noa iho 40 Fr.

Tairururaa no te mau himene e te otea i te hora 7 e te afa i te po i te Mahoro o te Hau. I taua po iho â ua faataihia te upaupa e te pŭpŭ no nia i te pahi atimarara. E mea navenave roa ia faaroorhia e te taata. Tei te hoperaa o te mau himene, e te mau otea, haamata ihora te turamaraa na te purumu, mai te Mahora o te Hau na te mau purumu e rave rahi, ma te arataihia e te upaupa. I te 25 no Novema te mahana 2 ia no te arearea rahi. No te mau huru faatitiauraa poti. Poti Hoe Noa.

Ua tufaahia teie nei mau faatitiauraraa poti i na tufaa e 6. Tei roto atoa teie faatitiauraraa te mau vaa rarahi tauati, te taraihia i te fenua nei, e te hoehia e na taata Tahiti. Tei te tahi te mau tane, tei te tahi te mau vahine. E te mau vaa rii i hoehia e na taata tootoru taata i nia iho. Ua horohia te rê mai te 100 Fr. o tei hau i nia a'e i tae roa i raro i te rê 15 Fr. i te itiraa. Ua faatitiaua atoa te mau poti, e te mau vaa ta ie. Te rê o tei hau i nia a'e 50 Fr., 20 Fr. te itiraa.

I te 26 no Novema te mahana 3 ia no te oroa rahi. Tatauraa himene i nia i te Mahora o te Hau. E te mau Otea. Mea navenave, i te faarooraa, e e mea vitiviti hoi i te hi'oraa. 250 Fr. te rê e hau a'e i te rahi, 100 Fr. te itiraa. I te po ua faataihia te upaupa navenave rahi e te pŭpŭ faatai upaupa no nia i te pahi atimarara.

I 27 no Novema i te hora 9 i te poipoi, faatitiauraa pereoo taataahi. Te rê e hau a'e 100 Fr., 10 Fr. te itiraa, na te tane ana'e teie mau rê. Na te vahine te rê e hau a'e 60 Fr. Te itiraa 40 Fr. Hora 2 i te ahiahi, i te Mahora o te Hau. Tuharaa rê a te mau himene e te otea. Hora vau i te po turamaraa no te mau pahi. E mea nehenehe roa te turamaraahia o te pahi atimarara. E piti pereoo taninito i faaterehia i te mau mahana e te po hoi no te Oroa, e ua faatai-noa-hia te upaupa navenave e raua, a tere noa'i. Arearea rahi te reira. E reva te pahi atimarara i te 8 no Ditema.

Te Mau Parau Api.

TEI Takune te vahi i haapaohia to matou amuiraa i te Eperera i mua nei. E haamana'o â te mau amaa ekalesia i te reira.

Te mana'o nei te hau Amerika e pau ai te moni 47,920,848 dara i te ohipa tapuraa e'a pahi i Panama i te matahiti i muri nei.

Ua faatere te taata ra o Alfred Le Blane i te oire ra o St Louis i Amerika i to'na pahi reva hoê maile i roto i na tetoni 53. Te maueraa e hau a'e i te oioi teie i te mau maueraa pahi reva i iteahia na.

I te mahana 26 no Novema ua tapae mai te pahi auahi Niu Zilani "Maitai." E ao a'era ua rave'tura i te oire ra o San Francisco. I parauhia e tere noa na pahi New Zilani e piti i te mau avae i roto i te matahiti i mua nei. E i te 28 ua tae mai te pahi auahi "Aoragi" no Tarafonia mai. E e mea rahi te mau vea i afaihia mai e ana, E ao a'era, reva'tura oia i Niu Zilani.

Ua roo-faahou-hia te fenua ra o Itali i te ati rahi. I te mahana 30 no Atopa, ua roohia te oire ra o Naples i te hoê vero rahi, e te hoê aueueraraa fenua. E ua haapuroro na mou'a auahi e piti i te ofai i tarapapehia i te veavea rahi i nia i te fenua'toa. E ua topa maira te pape paari i nia i te fenua ra. Ua hamani-ino-atoa-hia na oire e 11, e ua pohe roa na taata e 250 i taua ati rahi ra.

I te 10 no Novema, ua haere te peresideni o te fenua ra o Amerika, o Viliamu Taft to'na i'oa, i te fenua ra o Panama, na nia i te pahi manuâ "Tennessee." Ua haere atoa'tu te pahi manuâ "Montana" ei tauturu ia'na. Teie te tumu e haere atu ai oia i taua fenua ra, oia hoi ia maitaitai i te mau ohipa hamaniraa e'a pahi i reira, ia faaite oia i te apooraa faaaau ture no te hau, ia faaauhia te mau ture e ratou e au ai i taua fenua ra. I te mahana 22 no Novema, ua hoi faahou mai oia i te fenua ra o Amerika.

I te avae Novema i mairi a'enei te hopu noa ra te mau taata e rave rahi, ua tausani e tiahapa, i te tahi anavai pape papau i te fenua ra o India. E inaha oioi maira te pape pue rahi. Roohia ana'e ihora ratou i te ati rahi, no te mea e, aore ratou i ite i te au haere i te pape. Tei reira te tahi erefana rahi i te faacaraa. Tupu a'era te mana'o o te mau taata e taamu ia'na i te mau taura e rave rahi, faatere atura oia i ô atu i rotopu i taua mau taata ati ravea ore. A tae atu ai oia i rotopu ia ratou, ua haru te mau taata i te mau taura no nia mai ia'na, a puto noa'i oia ia ratou i uta. E ua na reira noa oia i te rave, a faaorahia'i 1000 taata ia'na. Area râ ua pohe roa na taata 200.

Ua pohe roa 1000 taata i te fenua Tinito. Teie te tumu i pohe ai ratou, oia hoi, ua roohia ratou i te vai pue rahi roa.

I te oire ra o Portland i Amerika i na avae i mairi a'e nei; ua faatomohia te tahi pahi Beritani i te iri raau 4,920,000 pie. I parauhia e hau a'e teie tomoraa i te rahi, i te mau tomoraa pahi i iteahia i te a'o atoa nei.

I te 13 Novema ua parau atura te taata Italia o Viliamu Marconi, na roto i te reva. Mai ô atu i te vahi ta'na e parahi ra, 4,500 maile i te tahi pae, e 2,500 maile i te tahi pae, ia amuihia e noaa 7,000 maile ua taeahia'tu taua parau no'na ra. O oia iho te taata ua imi, e ua itea taua ravea maere rahi apî nei parau reva. Auê atura hoi e, te paari e te mau ravea apî i imihia e te papaa i te tau hopea nei!

Tei Beritani te hoê totaieti pereoo auahi. E ua haapii ratou i te tahi mau urî, e ua riro atura ratou ei tiaï tao'a. Te tiaï noa ra te mau taata toroa te tao'a no teie nei totaieti ia po ra, mai te tauturuhia mai e te mau urî. Ua haapii-maite-hia te mau urî e hope roa'e. No reira eita roa e tia ia haere mai te hoê taata i taua vahi ra i tiaihia e ratou, maori râ ei ahu mutoi ana'e ta'na. Aita nehenehe ia haere mai te hoê taata i pihaiho i taua mau urî ra, maori râ te mau mutoi ana'e. E ia po ra ia tae mai te hoê taata, aore a'na ei ahu mutoi a haru noa teie mau urî e e haavî ia'na. Ia faataihia te hio no te mau mutoi e haapao maitai te mau urî i te reira. Ua hi'opoahia te ohipa a te mau urî e te totaieti, e mea maitai roa, te haere nei te eiâraa tao'a e te ohipa ino i te vahi i tiaihia e te mau urî i te itiraa.

I te mahana 15 no Atopa i mairi a'e nei, i te oire ra o Atalanita, i Amerika, ua haamata te hoê taata, o Walter Wellman to'na i'oa, e na taata toopae, i te maue mai te fenua ra o Amerika e tae roa i te fenua ra o Europa, na nia i te hoê pahi reva. Ua faarue ratou i te oire ra o Atalanita i te hora vau i te poipoi. Haamata ihora ratou i te tere mai te maitai; area râ, a tae atu ai ratou 900 maile i te atea, roohia ihora ratou i te hoê vero rahi, e aita e ravea ia faatere i ta ratou pahi. Ei reira, i te hora maha e te afa i te poipoi mahana 19 no Atopa, hi'o atura ratou i te hoê pahi auahi, te Trent to'na i'oa, i te tereraa i nia i te moana. Ua parau atura ratou i te raatira no taua pahi ra, na roto i te parau reva, i te na ôraa'tu e, "E pea-pea to matou; â tauturu mai ia matou." Taururu atura to te pahi auahi ia ratou, mairi ihora ratou i roto i te hoê boti mai nia mai i te pahi reva. Ei reira, ua afaihia ratou e te pereoo auahi i te oire ra o Niu Ioka i taua mahana ra. Panu ê atura te pahi reva i nia i te moana, moe ihora.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.